

美術叢書

四集第九輯二冊



376656

昭和 13.8.25 國立臺灣大學圖書館典藏
由國家圖書館數位化

書小史卷第六

錢塘陳思 纂次

傳五

晉宋齊

康昕字君明外國人官至臨沂令善正草書與南州惠式道人俱學二王輒以己書貨之世人有謬寶其蹟或謂爲羊欣王獻之嘗題方山亭壁數行昕密改之獻之後過不疑又爲謝居士題畫像以示獻之獻之歎能以爲西河之絕矣

惠式道人右軍之甥也學二王書歐陽通云其書與王無別

何充字次道廬江人官至侍中司空善行書書賦云次道淳實寡于風彩自是雄姿翰墨具在如士大夫之京華遊處參貴胄而膚質未改

劉訥字行仁瑯琊人官至散騎常侍善正書書賦云行仁靡雜唯鍾是師悅
端間于高軌能終始于清規雖帶偏薄亦能鄰幾若鳳雛始備于五彩長松
僅攀乎一枝

劉璞字子成南陽人官至光祿勳卽得道南嶽魏夫人之子善行草書書賦
云猗歟子成徇蹟過名正隸敦實藁草沈輕元常高風雖疎復呈猶不考擊
之鍾鼓含律呂之音聲

劉瓌字元寶沛國人官至御史中丞義成伯善行草八分太元中孝武帝令
八分題諸門榜書賦云元寶剛直兩王之次骨正力全軌範宏麗凌突子敬
病于輕肆同變武而習文若訪龍而獲驥

韋昶字文休卽魏侍中誕兄涼州刺史康之玄孫官至潁川太守散騎常侍

善古文大篆及草書每覽羲之父子書云二王未是知書者也又妙作筆子敬得其筆稱爲絕世太元中孝武治改宮室及廟門並欲使王獻之隸書題榜獻之固辭乃使劉瓌以八分書題之後又使昶以大篆改之

江灌字道羣陳留人官至侍中中護軍善行書書賦云道羣間漫氣格自充始習新制全移古風學伯輿王之合極若子敬之童蒙猶富禮樂之世冑備

神彩于厥躬

沈嘉字長茂吳郡人官至吳興太守善草書書賦云長茂草勢既捷而疏慕王不及獨斷所如猶鷺鳥擊搏而失中因踳踳于古墟

溫放之太原人嶠之子官至黃門侍郎善草書書賦云放之率爾草健筆力豈忘保持足見準則猶片錦呈巧細流不極

許靜民高陽人官至鎮軍參軍工草隸爲右軍高足善題宮殿額得方直之體其草稍乏筋骨亦景則李式之亞也

桓溫字元子譙國龍元人尙南康公主官至丞相大司馬南郡公諡宣武善行草書唐人云溫書如快馬入陣屈伸隨人書賦云元子正草厚而不倫若遺翰墨猶帶眞淳似山林之樂道非玉帛之能親

桓立字敬道溫之子官至義興太守其後篡晉僭號僞楚劉裕誅之立景慕二王善于草法王僧虔云每自比右軍議者未之許云可比孔琳之張懷瓘云立草法譬之於馬則肉翅已就蘭筋初成畜怒而行日可千里立嘗取羊欣爲征西行軍參軍立愛書呼欣就坐仍遣信乎願長康與共論書至夜不倦長康亦善書立愛重圖書每示賓客客有非好事者正食寒具以手捉書

書大點污立惋惜移時自後每出圖書輒令客盥手立愛二王書不能釋手
乃選縑素及紙書正行之尤美者各爲一帙嘗置左右及南奔雖甚狼狽猶
以自隨將敗並投于江書賦云敬道耽翫銳思毫翰依憑右軍志在凌亂草
狂逸而有度正疏澀而猶憚如浴鳥之畏人等驚波之泛岸

顧愷之字長康小字虎頭晉陵無錫人博學有才氣爲桓溫殷仲容參軍善
書圖寫特妙謝安深重之謂有蒼生以來未之有也時人號爲三絕謂癡書

畫也

張彥遠云長康三絕者才
絕書絕癡絕也畫非其數

諸葛長民瑯琊陽都人官至輔國將軍宣城內史善行書書賦云長民則全
效子敬便于性分宏逸生于天機衆妙總而獨運凌所師而小薄壯若己而
不索猶豁其流而冰開殷其響而雷奮

袁山松官至吳都太守小有才名博學有文章善書梁武帝云袁松山書如
深山道士見人便欲退縮

殷仲堪陳郡人官至冠軍將軍荊州都督能清言善屬文能書亦王敬仁之
亞也

陳暢滎陽人官至祕書令史善八分書晉宮觀城門皆賜書

楊真人諱羲弘農人居句容該涉經史有通靈之鑒善正行書簡文用爲公
府舍人後得道書賦云楊真人之正行兼淳熟而相成方圓自我結構遺名
如舟楫之不繫混寵辱以若驚

謝晉不知何許人善隸書

謝敷字慶緒會稽人性澄靜寡欲隱居徵辟皆不就善隸書王僧虔云謝謝

敬謝敷並善寫經亦入能境

宋珽廣平人官至相府參軍善行書書賦云宋珽訛緊足光利用習古者或以爲輕日新者必因而重猶樸散而分形器務成而立賦頌

王綏字彥獻坦之之孫官至冠軍將軍荊州刺史善正行書

羊忱泰山人官至徐州刺史善行草書庾肩吾云聲擅毫翰動則楷則

羊固泰山人官至臨海太守善正行書

盧循字子先少名元龍官至征虜將軍廣州刺史善草隸弈棋之勢循善尺牘尤珍名法西南豪士咸慕其風家贏金帛競遠尋求于是京師三吳二王之蹟頗爲所得

宋劉穆之字道和東莞莒人官至侍中司徒善隸草書與朱齡石並便尺牘

嘗于武帝坐與齡石並答書自旦至日中穆之百函齡石得八十函而穆之應對無廢書賦云道和間雅離古躡眞慢正尤德高縱絕塵若昂藏博達之士嘗諤朝廷之臣

朱齡石字伯兒沛人官至雍州刺史善尺牘

羊欣字敬元泰山南城人官至中散大夫義興太守少靖默無競于人泛覽經籍尤長隸書師資大令張懷瓘云敬元眞書劣于子敬幾季孟之差行草則去之彌遠子敬之後可以獨步時人云買王得羊非意所望今大令書中風神怯而瘦者往往是羊也時有丘道護稱工書親師子敬殊劣于羊欣書賦云敬元則親得法于子敬雖時移而間出手稽無方心敏奧術虛薄而不忘本分縱橫而粗得師骨遇其合時髣髴唐突猶圖騏驥而莫展索眞仙而

非實

孔琳之字彥琳會稽山陰人厥之子官至太常卿少好文義善隸行草書張懷瓘云師于小王稍露筋骨飛流懸沫勢則呂梁之水焉時稱云羊真孔草又以縱快比于桓立王僧虔云孔琳之放縱快利筆道流便二王以後略無其比但功夫恆少自任故未能盡其妙故當劣于羊欣斯言逾矣

薄紹之字敬叔丹陽人官至給事中善書張懷瓘云與羊欣並憲章小王風格秀異若干將出匣光芒射人魏武臨戎縱橫制敵其行草書倜儻時越羊欣若周才取之則真正懸隔袁昂云字勢蹉跌如舞女低腰仙人嘯樹至于揮毫振紙有疾閃飛動之勢書賦云競其豐利又覩薄氏纖圓克成骨力猶稚精彩潤密乃誠莫貳掩友凌師抑亦其次雖鎗無金價而珉實玉類

謝靈運陳郡人晉車騎將軍玄之孫也官至祕書監侍中康樂侯善書模憲
小王眞草俱美張懷瓘云若石蘊千年之色松標百尺之柯雖不逮師吸風
吐雲簸蕩山岳其亦庶幾靈運詩書皆兼獨絕每文竟手自寫之文帝稱爲
二寶與顏延之爲江左第一虞穌云靈運母劉氏乃獻之之甥故能書而特
多王法王僧虔云子上表多在中書雜事中靈運皆竊易其眞本相與不疑
元嘉初帝就索始進焉親聞文皇說此

謝方明陳郡陽夏人官至會稽太守善正書書賦云方明寬和隱媚且潤如
幽閒女德禮教士胤

謝惠連方明之子官至司徒府法曹參軍幼有詞學族兄靈運深所嘆服書
畫並妙

謝晦字宣明陳郡陽夏人官至中書令善書

見庚辰
吾書品

謝莊字希逸官至中書令散騎常侍善行書

蕭思話南蘭陵人官至征西將軍左僕射解音律工書受學于羊欣得行草之妙論者謂雖無奇峰壁立之秀連岡盡望勢不斷絕亦可謂有功矣王僧虔云蕭全法羊欣風流媚好殆欲不減筆力恨弱袁昂云羊真孔草蕭行范篆各一時之妙也然上方琳之不足下比范曄有餘書賦云思話綿密緩步娉婷任性工隸師羊過青似鳧鷖雁鷺游戲沙汀

王曇首僧虔父也幼而素尙兄弟分財曇首唯取圖書而已文帝時爲侍中驍騎將軍將善行草

范曄字蔚宗順陽人官至太子詹事蘊良史之才通音律之妙能該草隸小

篆尤精師範羊欣慕其俊拔王僧虔云與蕭思話同師羊欣而曄後背叛皆失故步名亦稍退曄傳自序云吾書雖小小有意筆勢不快餘竟不成就每愧此名

張裕字茂度齊郡人官至會稽太守善行草書

張永字景初裕之子官至征西將軍涉獵經史能文章善隸書行草文帝曰卿書但少王法永對曰每恨二王不得臣之體永更製御筆紙墨美殊前後

書賦云茂度逸翰景初清規或大言而峻薄

景初對文帝云臣恨二王不得臣體

或寡譽而拙奇

王僧虔書用拙筆以自容

並心輕兩王蹟及宗師擬鶴鳴而子和殊鯉退

而學詩

謝綜中書侍郎述之子范曄甥也官至太子中舍人有才藝善隸書王僧虔

云謝綜書其舅云緊潔生起實爲得賞每不重羊欣欣亦憚之然書法有力少媚好

顏延之字延年瑯琊臨沂人官至金紫光祿大夫領湘東王師少孤貧居好讀書無所不覽文章冠絕當時尤善書翰與陳郡謝靈運詞彩齊名江左稱顏謝焉文帝嘗問延之諸子才能延之曰竣得臣筆測得臣文彛得義躍得臣酒

顏竣字士遜延之之子官至右將軍楊州刺史善行書書賦云顏氏儒門士遜墨妙大令典則中散氣調薄首孔肩體格惟肖如驚弦履嶮避地膺峭王裕之字敬弘晉驃騎將軍廩之曾孫官至侍中光祿大夫善草書名與宋武帝諱同故以字行書賦云淮水茂族敬宏不墜故朝餘風翰墨兼至旣約

古而任逸亦遺能而獨駛猶創埏埴于昔人全朴略而成器

王微字景玄瑯琊臨沂人少好學善屬文工書兼解音律醫方卜筮陰陽術數之事尤善行草微嘗獨處一室尋書玩古遂足不履地終日端坐牀席皆生塵埃唯當坐處獨淨世祖以貞栖絕俗贈祕書監

宗炳字少文南陽人前後辟召皆不就少文妙善琴書圖畫行草尤工每游山水往輒忘歸凡所遊歷皆圖之于室坐臥響之其高情如此

丘道護善草書與王欣同受筆法于王獻之殊劣于羊欣李嗣真云道護謬登高品迹乃浮漫

王思立瑯琊人官至南康太守善行書書賦云蔓衍枝派思立不忘穩厚而無法度淳和而蓄鋒銳猶君子自適順時行藏

桓護之字彥宗洛陽人官至寧朔將軍善行書書賦云桓公護之神凝筆遲
富雅景乏士規猶門寒道高衣薛言詩

駱簡字正祖丹陽人官至鉅野令善行草書書賦云翩翩正祖恭已法則師
資小王深入閩域安知逸氣未詳筆力猶驥異真龍紫非正色

龐秀之官至江州刺史善正書書賦云二王變古法有所屬兢兢秀之斂翰
謹束如仙童樂靜不見所欲

巢尚之字仲遠魯國人官至寧朔將軍善行書書賦云仲遠循常由衷邇俗
企彥琳之孔琳之牆仞遵茂度裕張之軌躅豈聞一而得三同出吳而入蜀

裴松之字世期河東聞喜人官至散騎常侍善草書書賦云世期旁通崛強

斷利參方回愔鄰之章法得敬元欣羊之草意匪庖丁之解牛同君子之不器

徐爰字長玉瑯琊人官至中散大夫善正書書賦云長玉靡慢神間態穠荷
小王之偉質錯明帝之高蹤執德而風塵不雜發言而禮義攸從

江僧安陳留人官至太子中庶子善行書書賦云江侯僧安捷利而乾貌兼
輕媚體出多端猶廣庭之卉木小苑之峯巒

賀道力會稽人官至吳興令善草書王僧虔云顏騰之賀道力並便尺牘書
賦云道力草雄圓轉不窮壯自躬之體格疲逸少之遺風猶立言而逍遙出
世驗迹乃夙夜在公

王道迄吳興烏程人卽道隆之兄涉學善隸書形貌又美吳興太守王韶之
謂人曰有子弟如王道迄無所少也

齊王僧虔瑯琊臨沂人曇首之子官至尙書令簡穆公弱冠工書張懷瓘云

祖述小王尤尙古直若谿澗含冰岡巒被雪雖極清肅而寡于風味子曰質勝文則野此之謂乎初宋文帝見其書素扇嘆曰非惟蹟踰子敬方當雅量過之齊高帝善書及卽位篤好不已嘗與僧虔賭書畢謂僧虔曰誰爲第一僧虔對曰臣書臣中第一陛下書帝中第一上笑曰卿可謂善自謀矣武帝工書欲擅書名僧虔不敢顯其蹟嘗用拙筆書以此見容書賦云僧虔則密緻豐富得能失剛鼓怒駿爽阻圓任強然而神高氣全耿介鋒鏃發卷伸紙滿目輝光才行兼而雙絕名實副而特彰如運籌決勝威震殊方

王慈字伯寶僧虔之子官至侍中冠軍善行書少與從弟儉共書學謝鳳子超宗嘗俟僧虔乃往東齋詣慈慈正學書未卽放筆超宗曰卿書何如虔公慈曰慈書比大人如雞之比鳳超宗狼狽而退

王志字次道慈之弟官至侍中吏部尙書善稟隸當時以爲楷法游擊將軍徐希秀亦號能書嘗謂志爲書聖書賦云伯寶次道並資義訓兄則雜而外兼稟家君子己分弟則纖薄無滯過庭益俊並能寬間墨妙逸速毫奮比達士與君子人不知而不愠

王儉字仲寶僧綽之子官至尙書令善正書

褚淵字彥回河南陽翟人少有世譽善草隸書宋末與高帝同掌樞密齊臺建以佐命功授司徒中書監書賦云彥回無節筆翰亦爾快利不拘足用而已如拔楓柳抑亦杞梓

褚賁字蔚先淵之子官至祕書監善隸書因父憂免職便不仕時人以爲恥父失節于宋遂爾屏居書賦云蔚先忠良自我名揚老成不虧和雅允臧如

窮隱肥遁志傲侯王

劉休字弘明沛郡相人建元初官至御史大夫出爲豫章太守善隸書初羊欣授子敬正隸法衆共宗仰以右軍之體微古不復見貴及休始好右軍法因此大行

源楷之字那延官至黃門侍郎善草隸

徐孝嗣字始昌東海人官至太尉尙書令善正書書賦云非禮不言從容始昌如碩德君子道義難量而盛德有素筆精源長

劉係宗丹陽人官至寧朔將軍宣城太守便書畫尤工行草在宋爲竟陵王誕子景粹侍書入齊爲東宮侍書

蕭惠基思話之子官至左僕射善隸行書及弈棋之勢

張欣泰字義亨竟陵人少有志貌不以武業自居好讀子史善隸書

到搆字茂謙彭城人官至太子洗馬御史中丞善行書書賦云茂謙則壯而不密騁志恒俗輕師模任縱欲如勇夫格獸徑越林麓

顧寶光吳都人官至司徒左曹掾工畫善行書寶光卓越多奇自以伎能王僧虔嘗作飛白書以云之寶光曰下官今爲飛白屈矣

胡諧之豫章南昌人官至度支尙書善行書書賦云寶光諧之同調合韻差池去就羽翮齊振依蕭附王俱曰慕蘭論骨氣而胡壯驗精神而顧峻猶岸柳之先春得地連于河潤

紀僧眞建康人善行書事高帝在淮安以閑書題令答遠近書蹟自寒臣歷至高帝冠軍府將軍主簿初上在領軍府令僧眞學上手蹟下名至是報答

書疏皆付僧真上觀之笑曰我亦不能復別也

紀僧猛僧真之弟官至晉熙太守有風姿舉止善隸書又能飛白書

徐希秀瑯琊人官至驍騎將軍善行書書賦云希秀之蹟敬叔

薄紹之

之倫正

則謹促有度草則拘檢靡伸如儉德君子清朝士人

張融字思光吳郡人官至司徒左長史書兼諸體尤工于草如風鳧春林甚

有媚好齊梁之世殆無以過嘗自善其能帝曰卿書殊有骨力但恨無二王

法融答曰非恨臣無二王法亦恨二王無臣法書賦云思光逸才渾翰無滯

超寶光之力從僧虔之制超恆規而涉往出衆格而靡繼如塞路蓬轉摩霄

鳶唳

謝眺字玄暉陳郡陽夏人官至吏部郎中風華黼藻獨步當時工草隸蟲篆

張懷瓘云書甚有聲草殊流美亦猶薄暮川上餘霞照人春晚林中飛花滿目顏延之亦善草書卽眺之亞也

宗測字敬微炳之孫也代居江陵不應召辟驃騎將軍豫章王疑請爲參軍測答曰何爲謬傷海鳥橫斥山木性善書畫傳其祖業

劉瑱字士温彭城人官至吏部郎少聰慧多才藝工書畫

劉繪字士章彭城人性通悟有文義善隸書進對華敏數被召賞官至司馬從事中郎撰能書人名一卷嘗自云善飛白書言論之際頗好矜知

王僧祐字胤宗微之從子官至黃門郎雅好博古善老莊不尙繁華工草隸善鼓琴

周顒字彥倫汝南安城人初爲文惠太子中軍參軍歷官至中書郎兼著作

常游侍東宮少從外氏車騎將軍臧質家得衛恆散隸書法學之甚工尤善
行隸文惠太子使顓書立圃茅齋壁國子祭酒何胤以倒薤書求就顓換之
顓笑而答曰天下有道丘不與易也李嗣真云彥倫迹少俊銳可嘉

書小史卷第六終

...

...

...

...

...

...

...

...

...

...

...

...

書小史卷第七

錢塘陳思 纂次

傳六

梁陳

梁蕭子雲字景喬晉陵人齊豫章王嶷第九子官至侍中少善書小篆草行書體皆備張懷瓘云特妙飛白意趣飄然點畫之際有若騫舉妍妙至精難與比肩但少乏古風抑居妙品歐陽詢云蕭侍中飛白輕濃得中如蟬翼掩素遊霧崩雲可得而語其真書少學子敬晚師元常得其體勢雖少乏力及其暮年筋骨亦備蓋當世與朝奴之梁高祖雅重其書常論子雲書曰筆力勁駿心手相應巧踰杜度美過崔實當與元常並驅爭先其見賞如此子雲出爲東陽太守百濟國使人至建鄴求書逢子雲爲郡維舟將發使人于都

次候之望船拜行前子雲遣問之答曰侍中尺牘之美遠流海外今日所求
惟在名迹子雲乃爲停船三日書三十紙與之獲金貨數百萬書賦云景喬
則潤色鍾門性情勵已豐媚輕巧纖慢旖旎詩雖易其國風賜豈賢于夫子
猶鸞窺鏡而鼓翼虎不啞而履尾

蕭特字世達子雲之子官至太子舍人海鹽令善草隸時人比之衛恆衛瓘
武帝嘗使特書及奏帝曰子敬之迹不及逸少蕭特之書遂逼於父

蕭幾字德立齊江公遙欣之子年十歲能屬文性溫和與物無競清貧自立
好學善草隸書累遷新安太守

蕭確字仲正邵陵王綸之子官至廣州刺史永安侯有文才善行草書尤工
正書公家碑碣一皆使之初除祕書丞武帝曰爲汝能文故有此授書賦云

仲正則寬而壯賒而密婆娑滿跚綽約父質稟訓而微過任天然而自逸若衆山之連峯探仙洞之不一

王彬字思文志之弟好文章習篆隸與志齊名時人爲之語曰三眞六草爲天下寶尙齊高帝女臨海長公主拜駙馬都尉天監中歷吏部尙書祕書監梁武帝云王彬書放縱快利筆道流便

王籍字文海僧祐之子好學有才氣官至佐唐侯相甚工草書筆勢適放蓋琳之流亞也書賦云文海緊快勢逸氣高未忘俗格銳意操刀猶樂成名于朝野噉遁迹于蓬蒿

陸杲字明霞吳郡人官至光祿大夫楊州大中正好辭學工書畫其舅張融有高名杲風韻舉止頗類時稱日無對日下惟舅與甥書賦云陸杲迅熟騁

捷遺能任縱便無風梭如郊垆羽獵我戎奔騰

陶弘景字通明丹陽秣陵人官至諸王府侍讀永明中辭祿遂止句曲山自號華陽隱居好著述明衆藝善書師祖鍾王采其氣骨雜以楊許之法然真書體勢歐虞往往合之嘗答梁武帝論書啓云愚固博涉患未能精苦恨無書願作主書吏晚愛楷隸又羨典掌之人言人生數紀之內識解不能周流天壤區區惟恣五欲實可愧恥每云得作才鬼猶勝頑仙武帝嘗欲徵用隱居畫二牛一以金籠頭牽之一則透迤就水草梁武知其意不以官爵逼之朝廷有事多詢之號山中宰相書賦云通明高爽緊逼自然擺闔宋文峻削阮研載窺逸軌不讓眞仙猶龍髯鶴頸奮舉雲天

阮研字文磯陳留人官至交州刺史善書其行草出于逸少精熟尤甚其勢

若飛泉交注奔競不息張懷瓘云文磯與子雲齊名時稱蕭阮等各得右軍一體而此公筋力最優比之於勇則被堅執銳所向無前論之於談則緩頰朵頤離堅合異有李信王離之攻取無子貢魯連之變通可謂力過弘景雄蓋子雲其隸則習於鍾公風致稍怯庾肩吾云阮研居今觀古盡窺衆妙之門雖師王祖鍾終成別構一法亦有得矣書賦云文磯纖潤穩正利草輒媚橫流姿容娟好若其抑阮褒殷度幾同塵似泉激溜于懸磴木垂條于晚春王僧孺字僧孺東海郟人官至北中郎諮議參軍幼聰慧及長篤愛墳籍工屬文善楷隸聚書至萬卷率多異本

沈約字休文吳興武康人官至尙書令太子少傅博通典籍善屬文工草書

見法帖

柳惲字文暢官至吳興太守好學書尺牘能鼓琴特窮其妙梁武帝云柳惲書縱橫廓落大意不凡而得體未備

任昉字彥昇樂安人官至吏部郎掌著作善草書家藏書萬卷書賦云體縱閑利觀夫彥昇構牽掣而無法任胸懷而足憑猶注懸泉咽凝冰

殷鈞字季和陳郡長平人好學有思理善隸書爲當世楷法尤工行草南郡范雲樂安任昉並稱美之起家祕書郎鈞在職校定祕閣四部書更爲錄目又受詔科檢西省法書古迹別爲品目官至國子祭酒書賦云季和慢速風規所屬圓轉頗通骨氣未足

蕭賁字文煥竟陵王孫也官至河東太守幼好學有文才能書畫嘗于扇上圖山水咫尺之間便覺萬里爲遙矜慎不傳自娛而已

傅昭字茂遠北地人官至祕書監善草書書賦云茂遠捷銳足以自給彥和連環迅不可及如過雨之奔簷雷飛燎之赫原隰

朱異字彥和吳郡人居貧以傭書自業寫畢便誦涉獵文史通雜藝博弈書算尤善草書

陸倕字佐公吳郡人慧曉之子官至太常卿少勤學能屬文善行草書

庾詵字彥寶新野人幼聰悟武帝詔以爲黃門侍郎不起篤學經史百家無不該綜書射棊算並一時之絕

丁覘洪亭人頗善屬文殊工草隸顏氏家訓云孝元在荊州書記一皆委之軍府輕賤多未之重恥令子弟以爲楷法云丁君十紙不敵王褒數字吾雅愛其守迹嘗所寶持孝元嘗遣典簽惠編送文章示蕭祭酒問云君王比賜

書翰及寫詩筆殊爲佳手姓名爲誰都無聲問編以實答子雲歎曰此人後
生無比遂不爲世所稱亦是奇事於是問者少復刮目稍仕尙書儀曹郎後
爲晉安王侍讀隨王東下及西臺陷沒簡牘湮散丁尋歿于揚州前所輕者
後思一紙不可復得

到沈字茂瀋齊御史中丞摛之子官至北中郎諮議參軍美風神容止可觀
善屬文工篆隸

袁昂字千里陳都陽夏人仕齊爲祕書監黃門侍郎入梁官至中書監幼以
孝稱善書畫嘗著書評一卷

劉慧斐字宣文彭城人少博學能屬文起家安成王法曹參軍後不仕與處
士張孝秀居東林寺相得甚歡尤明釋典工篆隸在山手寫經二千餘卷

張孝秀字文逸南陽宛人爲建安王別駕頃之遂去職歸廬山居東林寺性通率不好浮華博涉羣書專精釋典善談論攻隸書凡諸藝能莫不明習孔敬通官至東宮學士能一筆草書一行不斷婉約風流特出天性頃來莫有繼者又創爲左右書當時座上酬答無有識者庾元威見而達之遂呼爲衆中清間法

庾元威字少明善蟲篆及雜體書作書論一篇行於世

徐僧權東海人官至梁東宮通事舍人領祕書以善書知名

劉孝綽字孝綽齊司馬從事中郎繪之子幼聰敏七歲能屬文號爲神童歷官祕書監善草隸自以書迹似父乃變爲別體

范懷約吳郡人官至東宮侍書善正行書梁武帝云范懷約眞書有力而草

行無功故知簡牘非易書賦云蠢蠢懷約任已作制若孤陋儒生辛勤一藝
江蓐字彥標濟陽考城人官至光祿大夫善行書書賦云彥標氣懦任力或
滯猶翮短風高升沈靡制

江祿字彥遐蓐之弟幼篤學有文章工書善琴位至太子洗馬湘東王錄事
參軍

徐伯珍字文楚東陽人少孤貧學書無紙嘗以竹箭箬葉甘蕉及地上學書
遂工楷隸

顏協字子和琅琊臨沂人爲湘東王記室少博涉羣書工草隸飛白吳人范
懷約能隸書協學其書殆過真也荆楚碑碣皆協所書時有會稽謝善勛能
爲八體六文方寸千言京兆韋仲善飛白並在湘東王府善勛爲錄事參軍

仲爲中兵參軍府中以協優于韋仲而減于善勛

庾肩吾字慎之新野人官至度支尙書才華並秀草隸皆善張懷瓘云歷記
專精遍採名法亦可謂瞻聞之士也然志雖奇古手不副情文勝質史是之
謂乎自號玄靜先生撰書品論一卷書賦云肩吾通塞併乏天性工歸文華
拙見草正徒聞師阮何至遼負使鉛刀之均鋒稱並利而則佞

陳顧野王字希馮吳郡吳人官至黃門侍郎領大著作幼好學長而遍覽經
史精記默識天文地理著龜占候蟲篆奇字無所不通尤善丹青時王褒能
書俱爲宣城王賓友人號二絕書賦云接武隨波雷同野王如異礪肥之挺
質俱竹柏之凌霜

徐陵字孝穆東海人官至左光祿大夫太子少傅善正書書賦云孝穆鄙重

剛毅任拙猶偏裨武夫膽勇智劣

趙知禮字齊旦天水隴西人官至右衛將軍涉獵文史善書翰工楷隸

張正見字見頤清河東武城人幼好學有清才善行草書仕梁爲彭澤令入
陳遷尙書度支郎

謝貞字元正幼有至性年十三善左氏工草隸蟲篆後爲南平王友掌書記
周弘讓汝南人天嘉初爲太常卿光祿大夫善草隸書賦云弘讓迅快放誕
可觀利疾速著輕乾若星居僻陋蔓木樛盤

王克瑯琊人官至尙書僕射善草書書賦云名劣筆健乃逢王克通流未精
疏快不忒猶腐儒宿士運用自得

蔡景歷字茂世濟陽考城人官至度支尙書少俊爽有孝行家貧好學善尺

牘工草隸

蔡徵字希祥景歷之子官至中書令善草書書賦云翩翩濟陽茂世希祥任樸無聞適俗不忘父輕而迅子凜而強

孫瑒字德璉吳郡人官至口部尚書少倜儻好謀略博涉經史尤便書翰

毛喜字伯武滎陽武人官至光祿大夫領右驍衛將軍少好學善草隸陳武帝素知之書賦云快哉伯武心空手敏古風若遺令範惟允如平效逸驥晚景飛隼

蕭乾字思惕蘭陵人官至五兵尚書容止雅正性恬簡善草隸得叔父子雲之法

蕭引字昇休官至正威將軍性聰敏博學能屬文善隸書爲當時所重宣帝

嘗披奏事指引署名曰此字筆勢翩翩似鳥之欲飛引謝曰此乃陛下假其毛羽耳又謂引曰我有所忿卿輒意解何也引曰此自陛下不遷怒臣何預此恩

江總字總持濟陽人官至尚書令善草書書賦云坡陀總持獨步方外甘率性而衆異非接武于興會若時違隱淪率不冠帶

沈君理字仲倫吳興人官至侍中尚書右僕射善草書書賦云仲倫則快速無度馳突不疏尺題已終筆勢仍餘似逸籠檻之衆鳥恣飛鳴之所如

蔡凝字子居濟陽考城人官至信威晉熙王府長史幼聰悟美容止既長博涉經傳有文詞尤工草隸

丁真善正書宣帝于太極殿內作鼎刻忠臣烈士名詔真書之

謝嘏字含茂陳郡人官至侍中中書令風神清雅頗善屬文尤工行草書賦云含茂悠悠薦臻同德迫時季而陵替俱道喪于翰墨徒糜鹿爲後先非勝負可差忒

袁憲字德章陳郡人官至右僕射善草書書賦云德章率爾流浪急速骨氣乍高風神入俗符縱志而失道等潰河與顛木

賀朗會稽人官至祕書監善行書書賦云賀氏日朗雖非動人不事筆力猶阻學貧若宦游旅泊衣化風塵

伏知道昌平人官至鎮北長史善草書書賦云知道則寬疏弛慢無可取則削凡常病室塞猶岸陸縱獺艱辛騁力

侯安都字成師始興曲江人官至侍中征北將軍涉獵書傳工隸書善騎射

書小史卷第八

錢塘陳思纂次

傳七

後魏後周

北齊

後魏崔悅字道儒清河東武城人善草隸與范陽盧諶並以博藝齊名故魏初重崔盧之書諶傳子偃偃傳子邈悅傳子潛潛傳子宏世不替業

崔潛悅之子善隸草常爲兄渾等誅手筆本草延昌初著作佐郎王遵業買書於市過得之年將二百寶其書迹深藏祕之武定中遵業子松年將以遺黃門郎崔季舒人多摹揚之左光祿大夫姚元標以工書知名於時見潛書以爲過于浩也

崔宏字玄伯潛之子官至吏部尙書爵白馬公少有俊才尤善草隸爲世模

楷行押特盡精巧宏自非朝廷文詰四方書檄初不妄染故世無遺迹

崔浩字伯淵宏之子官至司徒博覽經史立象陰陽百家之言無不該覽太祖以其工書常置左右人多託寫急就章從小至老初不憚勞所書蓋以百數浩書體勢及其先人巧妙不如也世藏其迹多裁割綴連以爲楷模

崔簡

一名覽

字仲亮浩之弟好學少以善書知名道武初歷中書侍郎爵五等

侯參著作事

崔衡字伯玉官至內祕書中散少以孝行著稱善隸札學崔浩頗亦相類當時詔命及御所覽書多其迹也

盧玄字子真范陽涿人曾祖諡晉司空劉琨從事中郎祖偃父邈並仕慕容氏初諡父志法鍾繇書子孫傳業累世有能名至玄父邈以上兼善草迹玄

子伯源習家法代京宮殿多其所題白馬公崔宏亦善書世傳魏衛瓘體魏
初工書者崔盧二門

盧晏博學善隸書有名于世位給事黃門侍郎

江式字法安陳留濟陽人六世祖瓊字孟琚晉馮翊太守善蟲篆詁訓永嘉
大亂瓊棄官投張軌子孫因居涼土世傳家業祖強字文威涼州平內徙代
京上書三十餘法各有體例又獻經史諸子千餘卷擢拜中書博士式少專
家學篆體尤工洛京宮殿諸門榜題皆式書也延昌中撰集字書號曰古今
文字凡四十卷以許書說文爲本上篆下隸官至符節令兼著作郎

江順和式兄之子官至征虜將軍亦工篆書

盧魯元昌黎徒河人敏而好學寬和有雅度以工書有文才累遷中書監領

祕書事賜爵襄城公善正隸書

谷渾字元冲昌黎人道武時以善隸書爲內侍左右太武時累遷侍中儀曹
尙書賜爵濮陽公

竇遵頓丘衛國人善楷篆北京諸碑及臺殿樓觀宮門題署多遵書位至濮
陽太守

竇僧演遵之子以善書拜庫部令

崔挺字雙根博陵安平人少敦學業多所覽究舉秀才射策高第拜中書博
士轉中書侍郎以工書受勅于長安書文明太后父燕宣王碑賜爵泰昌子
沈法會兗州人能隸書宣武在東宮勅法會侍會後以隸迹見知于閭里者
甚衆未有如崔浩之妙

劉芳字伯友彭城人官至安東將軍青州刺史善正書少時聰敏過人篤志墳典晝則墉書以自給資夜則讀誦終夕不寢常爲諸僧寫經論筆迹稱善卷直一縑歲中能入百餘匹如此數年賴以頗振著音義明辨疑者皆往詢訪故時人號爲劉石經撰急就篇續注音義三卷

劉懋字仲華芳之從子官至太尉司馬聰敏好學博綜經史善草隸書識奇字

郭祚字季祐太原晉陽人官至征西司馬將軍雍州刺史祚涉獵經史習習崔浩尺牘文章見稱于世尤善行書

柳僧習官至潁川太守敏于當世特善正書

柳楷字士則河東解人善草書頗涉文史位撫軍司馬

夏侯道遷譙國人歷華瀛二州刺史遍覽書史閑習尺牘

庾道穎川人歷覽史傳善草隸仕梁位至中郎將與夏侯道遷俱入魏後爲
饒安令卒

曹世表字景昇魏大司馬休九世孫性雅正工尺牘涉獵羣書孝昌中爲尙
書右丞遷東南道行臺

孫伯禮武邑人光祿大夫惠蔚之子善隸書位國子博士

裴敬憲字孝虞河東聞喜人爲太學博士少有志行學博才清工隸草解音
律

王世弼京兆霸城人官至中山內史平北將軍魁岸有壯氣善草隸書好愛

墳典

王由字茂道世弼之子位至東萊太守好學有文才尤善草隸書性方厚有
名士風又工摹書爲時人所服

李苗字子宣梓潼涪人官至尙書左丞善屬文工尺牘

蔣少遊樂安博昌人有才學敏慧機巧工畫善行草書及雕刻官至將作大
匠太常少卿前將軍都水兼此四官

劉仁之字山靜歷位將軍西兗州刺史少有操尙粗涉書史真草筆迹頗號
工便

李思穆官至營州刺史工草隸爲當時所稱

沈嵩官至司馬卽文秀族子善行書

呂溫字暕陽爲上黨太守善隸書

盧淵官至祕書監善正書傳鍾法有能名

宇文忠之河南洛陽人官至右丞涉獵文史頗有筆札尤善行草

北齊趙隱字彥深南陽宛人性聰敏善書計初爲尙書令司馬子如賤客供寫書子如善其無誤用爲書令史神武在晉陽索二史子如舉彥深後徵補大丞相功曹參軍專掌機密文翰多出其手稱爲敏給累官至司徒

張景仁濟北人幼孤家貧以學書爲業遂工草隸選補內書生與魏郡姚元標潁川韓毅同郡袁買奴滎陽李超等齊名世宗並引爲賓客天保八年敕教太原王紹德書後主在東宮世祖選善書人性行淳謹者令侍書景仁遂被引擢後主登祚歷位至開府侍書如故尋除侍中封建安王自蒼頡以來八體取進一人而已

崔季舒字叔正挺之從子官至光祿大夫待詔文林館涉獵經史長于尺牘
有當世才具

杜弼字轉玄中山曲陽人幼聰敏爲征虜府默曹參軍典管記弼長于隸札
每爲時輩所推

韓毅魯郡人工正書神武用爲博士以教彭城景思王洸

元行恭河南洛陽人美貌兼俊才善正行書位中書舍人待詔文林館

李元護遼東襄平人少有武力仕齊位馬頭太守雖以將用自達然亦頗覽
文史習于尺牘

劉珉字仲寶彭城人官至三公郎中善行草書李嗣真云珉書如顛波赴海
狂澗爭流書賦云蕭條北齊浩汗仲寶劣充凡正備法緊草退師右軍欵爾

由道宛千變而得一乘薄俗而居老如海岳高深青分孤島
劉玄平珉之子高道不仕贈貞範先生善行草書

殷英童善楷隸書兼工畫

後周黎景熙字季明河間鄭人從祖廣魏太武時爲尙書郎善古學從崔宏
崔浩受學字義楷篆自是家傳其法季明亦傳習之頗與許氏小異周文徵
入關令季明正定古今文字于東閣歷官至車騎將軍儀同三司

趙文深字德本南陽宛人少學楷隸年十一獻書于魏帝後立義歸朝除丞
相府法曹參軍文深雅有鍾王之則筆勢可觀當時碑榜惟文深及冀雋而
已太祖以隸書紕繆令文深與黎季明沈遐等及字林刊定六體成一萬餘
言行于世及隋文帝平江陵之後王褒入關貴游等翕然並學褒書文深之

書遂被遐棄文深慙恨形于言色後知好尚難反亦改集裊書然竟無所成轉被譏議謂之學步邯鄲焉至于碑榜餘人獨莫之逮王褒亦每推先之宮殿樓閣皆其迹也世宗令至江陵書景福寺碑漢南人士亦以爲工梁主蕭譽觀而美之賞遺甚厚天和元年露寢等初成文深以題榜之功除趙興郡守

趙仲將彥深之子官至給事黃門侍郎散騎常侍沈敏有父風溫良恭儉雖妻子亦未嘗怠慢終日儼然學涉羣書善草隸雖與弟書書字楷正云草不可不解若施之于人卽似相輕易若當家卑幼又恐其疑所在宜爾是以必須隸筆

冀雋字僧雋太原陽邑人性沈謹善隸書特工模寫太祖令雋僞爲魏帝勅

書與費士顯令將兵助太祖討侯莫陳悅雋依舊勅模寫及代舍人主書等署與真無異顯嘗得魏帝勅書及見此勅不以爲疑遂遺步騎一千授太祖節度尋徵教世宗及諸王隸書時俗入書學者亦行束修之禮謂之謝章雋以書字所興起自蒼頡若同常俗未爲合禮遂啓太祖釋奠蒼頡及先聖先師官至驃騎大將軍開府儀同三司

王褒字子淵瑯琊臨沂人官至司空博覽文史尤工屬文特善草隸梁國子祭酒蕭子雲褒之姑夫也褒以姻戚去來其家遂相模範俄而名亞子雲並見重于世雖神不俊亦士君子之流也

蕭撝字智遐蘭陵人梁武帝弟安成王秀之子也博觀經史雅好屬文侯景亂武陵王紀稱帝于蜀以撝爲益州刺史周王代蜀撝降歷少傅蔡陽郡公

搆善草隸名亞于褒

蕭慨梁武帝弟司空鄱陽王恢之孫深沈有體表好學善草隸書歷著作佐郎待詔文林館終于司徒從事郎中

竇慶扶風平陵人襲封陳公有姿儀性和厚工草隸

竇璉慶之弟亦工草隸頗解音律官至潁川南郡扶風太守

庾信字子山南陽新野人梁散騎常侍肩吾之子幼而俊邁博覽羣籍善行書仕周位至驃騎將軍開府儀同三司

柳弘字匡道官至御正下大夫少聰穎亦善草隸博涉羣書辭彩雅贍與弘農楊素爲莫逆之交

元禮少有志氣好弓馬閑草隸有士君子之風累遷征東將軍

顏之推字介瑯琊臨沂人協之人聰穎機悟博識有才辨工尺牘大象末爲
御史上士

薛慎字伯護河東汾陽人好學能屬文善草書歷中大夫保定初出爲湖州
刺史

隋楊素字處道弘農華陰人少落拓有大志不拘小節善屬文工草隸

盧昌衡字子均范陽人官至祠部侍郎太子左庶子風神澹雅博涉經史工
草行書書賦云昌衡跌宕率爾而作雖蔑法而或乘乃由衷而不忤似野筍
成竹長風損籜

閻毗榆林盛樂人能篆書工草隸尤善畫爲當時之絕周武帝時拜儀同三
司隋文帝愛其才藝令侍東宮官至朝散大夫將作少監

趙孝逸湯陰人官至四門助教深師右軍逸效大令甚有功業當平梁之後
王褒入國舉朝貴胄皆師于褒惟孝逸與文深二人獨負二王之法俱入隋
臨二王之迹人間往往爲賀耳書賦云文深孝逸獨慕前蹤至師子敬如欲
登龍有宋齊之面貌無孔灌之心胸

釋智永會稽人師遠祖逸少工草隸妙傳家法嘗臨寫真草千文八百本散
與人外江東諸寺各施一本今有存者猶直數萬錢住吳興永欣寺積年臨
書所退筆頭置之大竹籠受一石餘而五籠皆滿人來覓書或求乞師者如
市所居門限爲之穿穴乃用鐵葉裹之人謂之鐵門限後取筆頭瘞之號退
筆冢自製其銘張懷瓘云師遠祖逸少歷紀專精攝齊升堂真草惟命夷途
良轡大海安流微尙有道之風半得右軍之肉兼能諸體于草最優氣調下

于歐虞精熟過于羊薄

釋智果會稽人工書銘石煬帝甚善之其爲瘦健造次難類嘗謂智永師曰
和尚得右軍肉智果得其骨張懷瓘云夫字有萬象立鑑于心好其體質而
布其意且筋骨藏于膚肉山水不厭高深而此公稍乏清幽傷于淺露若吳
人之戰輕進易退勇而非武虛張夸耀果隸行入能品時有僧休僧特與果
俱師智永休困於肥鈍特傷於瘦怯皆不得中而智果差優書賦云智永智
果禪林筆精天機淺而恐泥志業高而克成或拘凝重蕭索家聲或利凡通
周章擅名猶能作緇門之領袖爲當代之準繩並如君子勵躬于有道高人
保志而居貞

釋敬脫善正書能用大筆寫方丈字天然遒勁不加修飾當時謂之僧傑

庾持字元德潁川鄆陵人篤志好學尤善書記以于藝聞名官至步兵校尉特善字書每屬書好爲奇字

虞綽字士裕會稽餘姚人官至著作佐郎博學有俊才尤工草隸

丁道護官至襄州祭酒從事善正書蔡君謨云道護書兼後魏遺法隋唐之交善書者衆皆出一法道護所得最多

虞世基字懋世會稽餘姚人博學有高才兼善草隸官至內史侍郎

房彥謙字孝冲清河人官至司隸刺史解屬文善草隸人有得其尺牘者皆寶翫之前後居官所得俸祿皆以周恤親友家無餘財嘗從容獨笑顧謂其子立齡曰人皆因祿富我獨以官貧所遺子孫在于清白耳書賦云彥謙草力浮緊循常糟粕右軍之化依稀夫子之牆如益星榆之衆象無月桂之孤

光

史陵善正書筆法精妙不減歐虞張懷瓘云褚遂良嘗師授史陵然史亦有高古傷于疏瘦

書小書卷第八終

書小史卷第九

錢塘陳思纂次

傳八

唐

唐房玄齡字喬齊州臨淄人隋司隸彥謙之子官至司空文昭公幼警敏貫綜墳籍善屬文書兼草隸後圖形淩煙閣讚云才兼翰藻思入機神書賦云房文昭則雅而和隱乃訛精神乏氣胸臆餘波若蘋萍異品共泛中河

歐陽詢字信本潭州臨湘人歷太子率更令幼孤陳中書令江總收養之教以書記聰悟絕人博覽古今書則八體盡能筆力勁險尤妙古篆高麗愛其書遣使請焉神堯歎曰不意詢之書名遠播夷狄嘗行見索靖所書碑觀之去數步復返及疲乃布坐至宿其傍三日乃得去其所嗜類此張懷瓘云詢

飛白冠絕峻于古人有龍蛇戰鬪之象雲霧輕籠之勢風旋雷激操舉若神
眞行出于大令森森焉若武庫矛戟風神嚴于智永潤色寡于虞世南其草
書跌宕通流示之二王可爲動色然驚其跳駿不避危嶮傷于清雅之致自
羊薄以後略無勁敵

歐陽通詢之子也累官殿中監早孤母徐教以父書懼其墮嘗遺錢使市父
遺迹通乃刻意臨仿以求售數年書亞於詢父子齊名號大小歐陽體通晚
自矜重以狸毛爲筆覆以免毫管皆犀象非是未嘗書書賦云學有大小夏
侯書有大小歐陽父掌邦禮子居廟堂隨運變化爲龍爲光

虞世南字伯施會稽餘姚人官至祕書監永興公性沈靜寡慾博達古今善
正行草書出于大令太宗每稱其五絕一曰德行二曰忠直三曰博學四曰

文詞五曰書翰世南始學書于浮屠智永遂究其法爲世祕受張懷瓘云其書得大令之宏規合五行之正色姿榮秀出智勇存焉絕頂危峯處處間起行草之際尤所偏工及其暮齒加以道逸書賦云永興超出下筆如神不落疏慢無慚世珍然則壯文磯阮研而老成與貞白陶景弘而德鄰如層臺緩步高謝風塵

虞纂世南族子書翰甚工有叔父體則而風骨不逮

虞煥世南之孫善書寶泉云子纂孫煥皆能繼世煥授武官在仗宿衛初隋有猛將來護兒子恆濟皆負才學入唐繼登三事故陸元方云來護兒兒把筆虞世南男帶刀言物極則反一至於此書賦云纂煥嗣聖體多拘檢如彼賦賦亂其琬琰

褚遂良字登善河南陽翟人官至右僕射河南公博涉文史工隸楷書太宗嘗歎曰虞世南死無與論書者魏徵白見遂良帝令侍書帝方博購王羲之故帖天下爭獻然莫能質其真僞遂良獨論所出無舛冒者嘗問世南曰吾書何如智永答曰吾聞彼一字直五萬君豈得此曰孰與歐陽詢曰吾聞詢不擇紙筆皆得如志君豈得此遂良曰然則何如世南曰君若手和筆調固可貴尙遂良大喜張懷瓘云遂良少則伏膺虞監長則祖述右軍眞書甚得媚趣若瑤臺青瑣宵映春林美人嬋娟似不任乎羅綺鉛華綽約甚有餘態遂良亦嘗師受史陵然史亦有高古傷於疏瘦書賦云河南專精克儉克勤伏膺告誓銳思猗文恐無成乎畫虎將有類于效嘖

曹憲揚州江都人官至祕書學士精于古字於小學家尤邃自漢杜林衛宏

以後古文泯絕至憲此學復興撰桂苑珠叢一百二十卷體製擬顧野王玉篇以小篆八分隸書三體正御本甚精

顏師古字籀京兆萬年人官至祕書監弘文館學士少博覽精訓詁學善屬文多藏古圖書器物書帖性所篤愛古篇奇字世所惑者討析申熟必暢本原

顏勤禮字敬官至著作朗幼而朗悟識量弘遠工于篆籀尤精訓詁祕閣司經史籍多所刊定與兄師古相時俱以文學爲崇賢弘文館學士太宗使蕭鈞贊曰依仁服義懷文守一履道自居下帷終日德影素里行成蘭室鶴鑰馳稱龍樓委質

顏昭甫字周卿勤禮之子少聰穎工篆籀草隸書與內弟殷仲容齊名而勁

利過之特爲伯父師古所賞凡所注釋必令參定爲天皇曹王侍讀曹王屬有獻古鼎篆書二十餘字舉朝莫能讀昭甫盡能讀之

劉仁軌字正則陳留尉氏人位至尙書左僕射工正行書少好學值隋末喪亂不遑專習每行坐書空畫地遂有能名

陸柬之吳郡人虞世南之甥也官至太子司議郎善正行草書李嗣真云柬之學虞草體用筆則青出于藍故非了雲之徒正隸工夫恨少不致高絕也張懷瓘云柬之少師世南臨寫所合亦猶張翼換羲之表奏蔡邕爲平子後身晚習二王尤尙其古中年之迹猶有怯懦總章以後乃備筋骨殊矜質樸恥夫纖靡故欲暴露瑕疵雖爲時鄙回也不愚尤善運筆至于興會則窮理造微然工于做做劣于獨斷以此爲少也

楊思道字景猷華陰人官至侍中中書令清警有才思善草隸工詩

上官儀字游韶陝人官至西臺侍郎工文詞涉貫墳典善書張懷瓘云楊思道上官儀劉伯莊並師法虞公過于纂矣

殷開山名嶠以字行京兆鄠人官至吏部尚書鄖國公開山涉書工爲尺牘

寶革云尺牘書通也見前漢陳遵傳

李懷琳洛陽人工臨寫善草隸好爲僞迹賞效王書大急就二本各十紙言辭鄙下而跋尾分明徐唐沈范蹤跡烜赫勞茹裝背持以質錢貞觀中敕頻搜求彼之錢主持以詣闕太宗殊喜賜縑二百疋懷琳乃上別本因得待詔文林館書賦云爰有懷琳厥迹疏壯假他人之姓字作自己之形壯高風甚少俗態猶多吠聲之輩或浸餘波

薛純陀太宗時官至祕書其書有筆法遒勁精悍不減歐陽詢張懷瓘云薛純陀學歐陽詢草書傷于肥鈍亦通之亞也

孫過庭字虔禮吳郡人官至率府錄事博通今古獨秀文華善正行草書張懷瓘云草書憲章二王用筆雋拔尙異好奇凌越險阻功用雖少而天才有餘眞行之書亞于草矣嘗作運筆論甚得書趣與王知敬友善王則過于遲緩孫亦傷于急速使夫二子寬猛相濟是爲合矣書賦云虔禮凡草閭闔之風千紙一類一字萬同如見疑于冰冷甘沒齒於夏蟲

錢穀善小篆飛白風流敏麗太宗甚賞其能

薛稷字嗣通河東人官至太子少保善書初貞觀永徽間虞世南褚遂良以書顯家後莫能繼稷外祖魏徵家多藏虞褚書故銳精臨倣結體遒麗遂以

書名天下畫又絕品睿宗在藩喜之張懷瓘云師學褚公尤尙綺麗媚好膚肉得師之半可謂河南公之高足當時無及之者甚爲時所珍尙書賦云少保師褚菁華卻倍超石鼠之效能愧隋珠之掩類

魏叔瑜字思瑾鄭公之子善草隸書嘗以筆意傳其子華及孫薛稷

魏華字茂實叔瑜之子官至太子左庶子世業清素尤好書翰初與薛稷俱師于褚後習右軍行草其迹遂過于師世稱善書者前有虞褚後有薛魏

裴行儉字守約絳州聞喜人官至禮部尙書工草隸行書及章草高宗嘗以絹素令寫文選一部覽之祕愛其法資物良厚嘗謂人曰褚遂良非精筆佳墨未嘗輒書不擇筆墨而妍捷者惟予與虞世南耳所撰草字雜體數萬言傳于世

姜協字壽□秦州上邽人善篆籀歷燕然都護夏州都督封成紀縣侯諡曰威

殷令民陳郡人善正書與其子仲容皆以能書擅名一時而令民筆法精妙不減歐虞

殷仲容令民之子官至禮部郎中善正書尤精題署武后嘗詔仲容題資聖寺額王知敬題清禪寺額當時謂之雙絕書賦云殷公王公兼正兼署大乃有則小非無據麒麟將騰鸞鳳欲翥題二榜而迹在歎百川而身去

王知敬懷州河內人官至太子家令工草行及章草尤善題署李嗣真云房僕射字雕文抱質王家令碎玉殘金房如海上雙鷁王比雲間孤鶴

王知慎知敬之弟官至少府監工書善畫與兄知敬齊名張彥遠名畫錄云

長安靈苑寺西廊北院有趙武端畫淨土變相知慎甚有功

宋令文虢州弘農人有勇力工書畫善屬文高宗時爲驍衛將軍東臺詳正學士世稱令文三絕書畫力也張懷瓘云令文尤好於書備兼諸體偏意在章志欲究能力用皆殷筋骨終寡亦得書之媚趣公有三子之問以文詞知名之悌有勇力之遜精草隸世謂皆得父一絕

王紹宗字承烈廣陵江都人官至祕書少監少貧狹嗜學工草隸客居僧房寫書取庸自給張懷瓘云紹宗清鑒遠識才高出羣書則祖述子敬欽羨東之其草則攻乎異端度越繩墨其正行與章草則體象尤異沈邃堅密然華不逮陸而古乃齊之嘗與人書曰鄙夫書翰無功者特由水墨之積習耳當精心率意虛神靜思以取之吳中陸大夫嘗以余比虞君以不臨寫故也聞

虞被中畫腹爲余正同虞卽世南也兄嗣宗亦善書師陸柬之甚有骨氣而性矛楯書賦云王祕監則首末全貞尊道重德或終紙而結字或重模而足

遵句反

墨濩落風規雄壯氣力播清譽而祖述屢見傷于有識如曲圃鴻飛芳

園桂植

高正臣廣平人官至衛尉少卿善正行草書習右軍之法次之甲乙脂肉頗

多骨氣微少睿宗甚愛其書張懷瓘云先君張瓘強仕之年與高有舊朝士

就高乞書或憑先君書之高嘗爲人書五十紙先君戲換五紙又令示高高

竟不辨客曰有人換公書高笑曰必是張公也乃審詳之得三紙客曰猶有

在高熟視之終不能辨陸柬之嘗爲高書告身高常嫌之不將入帖後爲鼠

傷乃謂先君曰此鼠甚解正臣意其風調不合乃爾

李思訓唐宗室也官至右武衛大將軍彭城公早以藝稱高宗甚重之畫山水得名亦能隸筆李北海邕爲其碑云思訓畫工神于鄭陸墨妙聖于鍾王鍾紹京虔州贛人魏太尉繇十五代孫以善書直鳳閣武后時署諸宮殿明堂及銘九鼎皆其筆也尤善草隸當時呼爲小鍾其字畫妍媚遒勁有法石泉公王方慶素尙毫翰每還私第必請紹京盛論法書方慶常疾須紹京言書輒差右相楊再思以爲鍾君可愈王侍郎疾也張昌宗搜訪天下圖書以紹京妙識古今奏請直祕書寶匣奇蹟莫不徧覽明皇在藩邸愛重其書及卽位拜戶部尙書太子詹事紹京嗜書畫如王羲之獻之楮遂良眞蹟家藏至數千百卷

賈膺福官至太子中舍人善八分筆法精妙可喜按舊唐史云武后鑄九鼎

圖寫山川物象命工書人賈膺福薛昌容李元振鍾紹京等分題之

顏元孫字聿修昭甫之子少孤養于舅殷仲容家尤善草隸仲容以能書爲天下所宗人造請者賤盈几輒令代遣得者欣然莫之能辨玄宗出諸家書迹數十卷曰聞公能書可爲定其真僞公分別以進玄宗大悅賜賤藤筆墨衣服等物著于祿字書行于世

顏惟貞字叔監元孫之弟官至太子文學薛王友仁孝友悌少孤育舅殷仲容氏蒙教筆法家貧無紙筆與兄以黃土埽壁木石畫而習之故特以草隸擅名杜審言字必簡襄陽人官至國子監主簿修文館直學士性滑稽雅善五言詩工草隸嘗謂人曰吾文章當得屈宋作衙官吾筆當得王羲之北面

其矜誕類此

盧藏用字子潛幽州范陽人官至黃門侍郎才貌清雅工草隸大小篆八分善琴弈張懷瓘云幼尙孫薛晚師右軍雖闕于功績閒于體豔八分之製頗傷疏怯呂總云盧藏用八分如露潤花妍煙凝修竹

魏哲善草草及應命而作略無疑滯功夫越于子潛而氣魄不逮也

張旭蘇州吳人官至右率府長史善草書自言我見公主擔夫爭路而得其意又觀公孫氏舞劍氣而得其神性嗜酒每飲醉輒草書揮筆大叫或以頭搥墨中而書旣醒自視以爲神異不可復得呼爲張顛嘗私謂鄔彤曰孤蓬自振驚砂坐飛予師而爲書故得奇怪凡草聖盡于此矣初仕爲常熟尉有老人陳牒求判宿昔又求旭怒其煩責之老人曰觀公筆迹奇妙欲以藏家耳旭因問所藏盡出其父書旭視之天下奇筆也自是盡其法旭以善草得

名亦甚能小楷蓋虞褚之流也書賦云張長史則酒酣不羈逸軌神澄回眸而壁無全粉揮毫而氣有餘興若遺能于學知遂獨荷其顛稱

司馬承禎字子微洛州溫人隱天台華峯號白雲先生開元中召至京師敕於王屋山置壇室以居善篆籀帝命以三體寫老子刊正文句著坐志論八篇年八十九卒諡貞一先生

賀知章字季真會稽人官至祕書監自號四明狂客善草隸嘗與張旭遊於人間凡人家廳館好牆壁及屏幃忽忘機興發筆落數行如蟲豸飛走雖古之張索不如也好事者具筆硯從之意有所愜不復拒然每紙纔十數字世傳以爲寶天寶初請爲道士還鄉里詔許之以宅爲千秋觀仍賜剡川鏡湖

宋儋字藏諸廣平人高尚不仕戶部侍郎宇文融薦授祕書省校書郎善書作鍾體而側戾放縱迹不副名開元末舉場中後輩多師之呂總云宋儋書如暮春花發夏柳枝低

李璆隴西人性疏達輕財重諾善書筆路緊媚亦有聲于代書賦云宋儋李璆擅美中州李師王而意淺宋祖鍾而體流

吳道玄陽翟人官至寧王友工書善畫好酒使氣每欲揮毫必須酣飲學書于張長史旭賀監知章其迹似薛少保亦甚便利初名道子玄宗改名道玄張懷瓘云吳生之畫下筆有神是張僧繇後身也

鄭虔鄭州滎陽人官至著作郎善圖山水好書常苦無紙知慈恩寺有柿葉數屋遂借僧房居之日取葉學書歲久殆遍玄宗愛其材爲置廣文館以虔

爲博士嘗自寫其詩并畫以獻帝大署其尾曰鄭虔三絕呂總云鄭虔書如風送雲收霞催月上

盧鴻字顥然其先范陽人隱居嵩山博學善篆籀及楷隸開元初備禮徵至東都拜諫議大夫固辭還山廣學廬聚徒至五百人

陸堅洛陽人初名友悌玄宗嘉其剛正更賜名堅官至祕書堅善書帝待之甚厚圖形禁中親制贊

李巖趙州高邑人歷官兵部侍郎善草隸

呂向字子回涇州人少孤託外祖母隱陸渾山工草隸能一筆環寫百字若縈髮然世號連綿書官至工部侍郎文詞學業當代莫比書賦云呂公歐鍾相雜自是一調雖則筋骨乾枯終是精神嶮峭其于小楷尤更巧妙梁昇卿

善小篆八分呂總云梁昇卿八分如驚波往來巨石前卻

郭謙光官至國子監丞善八分初不見稱於唐人獨歐陽公修盛稱其字畫筆法不減韓蔡史李四家

韓擇木昌黎人官至工部尙書右散騎常侍工八分書師蔡邕法風流間媚爲伯喈中興書賦云韓常侍則八分中興伯喈如在光和美古今迭代昭刻石而成名類神都之冠蓋

李邕字泰和揚州江都人官至北海太守善行書以文名天下時稱李北海文章書翰公直詞辨義烈英邁皆一時之傑夫人之藝術多不兼稱至於王逸少以書掩其文李淳風以術映其學如公之藝六事成絕古今罕傳呂總云李邕書如華岳三峯黃河一曲

書小史卷第十

錢塘陳思纂次

傳九

唐

蕭誠蘭陵人官至右司員外郎工正書善摹勒弟諒亦善書世謂誠眞諒草
開元中時尙褚薛誠爲之最善李邕每不重誠誠因採西山野麻繞郡土穀
造五色斑文紙作王右軍書帖與之邕覽翫不悟謂其眞迹誠因道其所撰
邕乃歎服

張庭珪河南濟源人官至太子詹事工八分書素與李邕親善屢上表薦之
邕所撰碑碣必請庭珪八分書之甚爲時人所重庭珪家多法書亦善正隸
頗有獻之之法

史白廣陵人官至諫議大夫善飛白

史惟則字子華白之子官至殿中侍御史工八分頗近鍾書發筆方廣字形峻美亦爲時所重尤善篆籀飛白弟懷則亦善八分書賦云史侍御惟則必優世業階乎籀篆古今折衷大小應變如因高而矚遠俯川陸而必見

蔡有鄰濟陽人官至胄曹參軍善八分始拙弱至天寶中遂精妙相衛間多其筆迹蔡希寂有鄰從子爲洛陽令深工草隸頗爲當時所稱

田琦雁門人武德功臣兵部尙書德平之孫工八分小篆書署書圖畫歷官豫蘄許等州刺史書賦云赫赫許昌鞠苑文房徵前賢而少對當聖代而難方

顧誠奢官至太子文學翰林院待詔善八分杜甫集有贈顧八分文學詩卽

誠奢也詩云中郎石經後八分蓋顛頓顧侯運鑪錘筆力破餘地昔在開元中韓蔡同蟲鳳玄宗妙其書是以數子至此詩蓋謂誠奢也

韋陟字殷卿京兆萬年人風格秀整善文詞書有楷法常以五彩牋爲書記使侍妾主之其裁答授意而已皆有楷法惟陟署名自謂所書陟字若五朵雲時人慕之號郇公五雲體呂總云韋陟書如蟲穿古木鳥踏花枝韋斌陟之弟少修整好文藝善隸書與兄陟齊名天寶中爲中書舍人集賢院學士衛包京兆人工八分古文小篆通字學兼象緯之術官至尙書郎包以古文見稱于當時甚盛

蘇誥字廷言丞相瓌之子善八分瓌與東明觀道士周彥雲素相往來彥雲將爲其師建碑謂瓌曰成某志不過煩相君數子耳五郎文頭六郎致石冰

七郎書

說

瓌大笑不言而心服其公

鄔彤錢塘人爲金吾兵曹參軍善草書好得其法時人比之張旭蓋親得張公之旨呂總云鄔彤書如寒林棲鴉平岡走兔

徐安貞善隸書初名楚璧開元中爲中書侍郎嘗參李右相議後林甫用事恐罪累乃逃隱於衡嶽爲掇蔬行者而病啞不言數年後因修建佛殿僧中選善書者題其梁已二三人矣徐行者跨梁而過掌事人怒以杖連擊其背徐以手畫地曰口雖不言昔年曾學大書願試書及題數行羣僧悅服因遣盡書之後李邕過寺見其題處大驚召之同載而歸

胡沛然安定人工行書八分小篆筆法雖未至而媚熟可喜上黨佛寺畫壁多沛然所書

李造隴西人官至起居舍人武都公善隸書入能品

李潮杜甫之甥善八分小篆杜甫盛稱之以比蔡有鄰韓擇木

見杜集八分小篆歌

徐嶠之越州人官至廣平太守善正行草書名冠古今無與爲比常以其法授其子浩嶠之神道碑云初獻策十八篇進書六體明皇手詔答曰得所進書甚可觀覽回鸞顧鶻墜露凌雲旣極臨池之功足方懸帳之妙今賜物三十段用彰翰墨之佳也

徐浩字季海嶠之子官至彭王府會稽郡公善正行草書四方詔令多出浩手遣辭贍速而書法至精帝喜之嘗書四十二幅屏八體皆備草隸尤工世狀其法曰怒猊抉石渴驥奔泉

王維字摩詰太原祁人官至尙書右丞與弟縉齊名維工草隸善畫能詩名

盛於開元天寶間豪英貴人虛左以迎寧薛諸王待若師友畫思入神至山
水平遠雲勢石色繪工以爲天機所到學者不可及也其詩自云夙世定辭
客前身應畫師

王縉字夏卿維之弟官至丞相善草隸書功超薛稷國史補云縉與維名望
首冠一時議者云論詩則王維崔顥論筆王縉李邕祖詠張說不得預焉

李陽冰趙郡人官至將作大匠工於小篆初師李斯嶧山碑後見仲尼吳季
札墓誌變化開闔龍蛇盤踞勁利豪爽風行雨集文字之本悉在胸臆自言
得篆籀之宗旨斯翁之後直至小生曹喜蔡邕不足數識者謂之倉頡後身
從子騰亦工小篆書賦云吾家世業趙郡李君嶧山並驚宣父同羣洞於字

學古今通文家傳孝義意感風雲

張誼官至刑部員外郎明易象丹青善草隸與王維李頎爲詩酒丹青之友
李頎答詩云小王破閒體文策落日梨花照空壁詩堪記室妬風流畫與將

軍作勁敵

畫一作書

李權淮安王神通之曾孫歷官金州刺史工八分

李樞權之弟官至侍御史工小篆

李平鈞權之姪官至江陵掾富詞學工小篆兼妙山水並冠絕一時書賦云

溫良之德書畫兼美誠依仁以游藝同上善之若水

鄭遷及弟邁逾並工八分遷官至凌儀尉季弟逾兼善山水天寶中知名梁

宋書賦云滎陽昆弟內外光華揮毫美利自是一家幼弟曰逾丹青大誇信

斲玉而剖石卽揀金而披沙

張懷瓘海陵人爲翰林供奉右率府兵曹參軍善正行草書亦能臆斷呂總云懷瓘草書如露花濯錦淵月沈珠懷瓘每云書者猶人相知始疏而終密則大同始密而終疏則大異小人甘以壞君子淡以成耀俗之書甘而易入乍觀肥滿悅心豁目亦獨鄭衛之在焉撰評書藥石論書斷書估等書行於世弟懷瓌亦善書至盛王府司馬待詔翰林

顏允南字去惑惟貞之子官至國子司業少以詞藻擅名工草隸書尤善五言詩深爲伯父元孫所稱

顏真卿字清臣允南之弟官至太子太師魯國公少勤學孝敬有文辭善正行書結筆濃秀尤尙字學可謂書之大雅矣陸羽嘗論其體得羲之之筋骨心跡也公授筆法于張長史又嘗問法于釋懷素素告以拆壁路公曰何如

屋漏痕素起捉公手曰老賊得之矣

張志和字子同婺州金華人性高邁不拘自稱煙波釣徒著玄真子亦以自號與顏魯公友善工草書迹甚狂逸亦善圖山水自爲漁歌畫之甚有逸思韓滉字太冲京兆長安人官至左僕射平章事封晉國公工隸書章草尤善雜畫書得張旭筆法畫與韓幹相埒自言不能定筆不可論書畫以非急務故自晦不傳於人

張從申官至大理司直志業精絕工正行書握管用筆其於結字緊密近古所無恨於歷不多聞見遂寡右軍之外一步不窺意多揚書闕于真迹黃長睿云從申雖學右軍其原出於大令筆意與李北海同科故名重一時宜不虛得但所短者抑揚低昂太過又真不及行耳然唐人而有晉韻殊可嘉尙

弟從師監察御史從義從約灼然有才並工書皆得右軍風規時人謂之張氏四龍書賦云張氏四龍名揚海南厥有季弟工夫少對右軍風規下筆斯在季謂從申也

劉繪彭城人爲延安都督善書

明若山平原人爲京兆三原縣大理評事善書書賦云延安君則快速不滯若懸流得書三原君則婉媚功密似垂楊應律

竇蒙字子全官至國子司業善書書賦云吾兄則書包雜體首冠衆賢手關目瞥瞬息彌年比夫得道家之深旨習閩風而欲仙

竇衆字靈長蒙之弟官至刑部員外郎詞藻雄贍草隸精絕著述書賦一篇兄蒙爲之注

喬龜年善小篆養母至孝大歷中每爲人寫大字獲其錢以供甘旨

瞿令聞善八分古文倒薤藝兼篆籀

齊皎高陽人官至澤州刺史曉音律善大篆工小楷筆蹟雄壯

林傑字智周閩川人精琴棋善草隸俱自天然不因師授

徐疇浩之子幼勤學善眞行書能別識書畫

徐峴疇之弟善正書

袁滋字德深蔡州人官至兵部尙書強學博記工篆隸有古法

吳通玄海州人與弟通微皆博學善文章並侍太子游德宗立弟兄踵爲翰

林學士並知制誥通微工行草書翰林習之號院體

沈傅師字子言蘇州吳人官至吏部侍郎材行有餘工書有楷法

柳子厚河東人少精敏文章卓偉善書家蓄魏晉尺牘甚富臨池訣云柳宗元與劉禹錫得筆法於皇甫閱以宗元爲入室禹錫及門宗元頗自矜其書然亦不甚工

裴潏河東聞喜人官至兵部侍郎篤學善隸書

裴休字公美孟州濟源人官至吏部尙書太子少師能文章善正書體法道媚休早隸于河內後登顯位乃建刹於彼目爲化成寺尋授太原節制經由是寺僧粉壁陳筆硯候公親題之公神色自若以衣袖搵墨以書之字勢奇絕

柳公權字誠懸官至太子少師善正行書初爲夏州李聽掌書記穆宗卽位入奏事召見謂之曰朕常於佛寺見卿筆蹟思之久矣卽日拜右拾遺充翰

林侍書學士遷右補闕司封員外郎穆宗政闢嘗問公權筆何盡善對曰用筆在心心正則筆正上改容知其筆諫也公權初學王書遍閱近代筆法體勢勁媚自成一家當時公卿大臣碑版不得公權手筆者人以爲不孝外夷入貢皆別署貨貝曰此購柳書文宗夏日與學士聯句帝曰人皆苦炎熱我愛夏日長公權曰薰風自南來殿閣生微涼時丁亥五學士皆屬繼帝獨諷公權兩句曰詞清意足不可多得乃令公權題于殿壁字方圓五寸帝視之歎曰鍾王復生無以加焉大中初轉少師中謝宣宗召升殿御前書三紙軍容使西門季玄捧硯樞密使崔巨源過筆眞書十字曰衛夫人傳筆法於王右軍行書十一字永禪師眞書千字文得家法草書八字曰謂語助者焉哉乎也賜錦綵瓶盤等銀器仍令自書謝表不拘眞行帝尤奇惜之嘗書京兆

西明寺金剛經有鍾王歐虞褚陸諸家法自爲得意

柳仲郢字諡蒙公權從子幼嗜學工草隸札節九經三史魏晉以下南北史分門上下凡三十卷號柳氏自備小楷精謹無一字行書當時甚賞其工盧知猷字子暮官至太子太師器度渾厚文詞瞻麗工草隸有楷法落簡飛翰人爭摹倣

唐玄度官至翰林待詔沔王友善小篆名於一時筆法柔弱無復前人之比而流俗妄稱惜之

于僧翰河南人特工八分與貝靈該俱擅名江左靈該效明皇書筆力柔弱略盡而已僧翰師韓擇木字勢研美筆畫遒勁兼用篆法然其格律不高亦自成一家爾

周墀字德升汝南人官至尙書左僕射長于史學尤工小篆見稱于一時字畫頗佳傷于柔媚

陸希聲博學善屬文工書得其法凡五字撇押鉤格抵用筆雙鉤則點畫遒勁而盡其法謂之撥鐙法希聲自言昔二王皆傳此法自斯翁以至陽冰皆得之希聲以授沙門警光光復入長安爲翰林供奉引希聲于貴倖昭宗召爲給事中後位至宰相

僧懷素字藏眞長沙人疏放不拘細行頗好筆翰貧無紙可書嘗于故里種芭蕉萬株以供揮灑書不足乃漆一盤書之又漆一方板書至再三盤板皆穿吏部尙書韓陟見而賢之曰此沙門札翰當振宇宙大名授筆法於金吾兵曹鄔彤鄔彤嘗謂懷素曰草書古勢多矣惟太宗以獻之書如凌冬枯樹

寒寂勁硬不置枝葉張旭長史又嘗私謂彤曰孤蓬自振驚沙坐飛余師而爲書故得奇怪凡草聖盡於此懷素不復應對但連叫數十聲曰得之矣顏魯公嘗問師曰夫草書於師授之外師有自得之乎師曰貧道觀夏雲多奇峯輒嘗師之夏雲因風變化乃無常勢又遇壁坼之路一一自然顏公曰噫草聖之淵妙代不絕人可謂聞所未聞之旨也

釋高閒善草書師懷素深窮體勢韓文公嘗以序送之極稱其善張祜承吉亦有詩云卷軸朝廷口書函內庫收

釋亞棲洛陽人善草書自云其書如飛鳥出林驚蛇入草嘗對御草書兩賜紫袍有詩云通神筆法得玄門親入長安謁至尊莫怪出來多意氣草書曾

悅聖明君

釋貫休蘭溪人善歌詩工草隸南土皆比之懷素尤善丹青多畫佛像
釋魯光善書授撥鐙法於陸希聲自後書法頓長光入長安爲翰林供奉希
聲猶未達因寄詩曰筆下龍蛇似有神天池雷雨變逡巡寄言昔日不龜手
應念江頭泝滌人魯光因引薦希聲於貴倖後至貴顯

釋洪堰博學儒釋風姿秀整能講唱詩篇草隸皆極精妙時人以其貌義詩
書謂之四絕

五代楊凝式字景度唐相涉之子有文辭善筆札歷仕梁唐晉三代佯狂不
任事累官至太子少師致仕居洛陽延福坊其書法自顏以入二王之妙洛
人得凝式真蹟夸詡以爲希世珍西洛寺觀二百餘所題寫幾遍時人以楊
風子呼之

羅紹威字端己魏州貴鄉人仕梁累拜太師中書令少好學工書頗知屬文聚書數萬卷開館以延四方之士

馬胤孫字慶先棣州人少好學事後唐爲宰相晉時以太子賓客罷歸洛陽嗜八分書尺牘訓答必札其蹟

李鵬後唐清泰中仕至國子丞九經印板多其所書當時頗貴重之其筆法蓋出歐陽率更然窘于法度而韻不高非名書也

李從曠茂貞之子善書畫仕後唐襲爲鳳翔節度

南唐後主李煜字重光善屬文工書畫王師克金陵俘至京師赦之爲違命侯煜又能作撮金書自言得筆法于先王然枯勁無可取者

韓熙載仕季煜官至中書侍郎才俊氣逸工書畫特善八分皆冠絕當時柳

徐鉉字鼎臣金陵人隨李煜歸朝官至散騎常侍好字學善篆隸初學李陽冰後得李斯嶧山碑潛思改作遂逼其勢弟錯亦能八分小篆而筆法頗少力其在江南皆以文翰知名號二徐爲學者所宗

郭忠恕字恕先洛陽人七歲童子及第漢周之際爲湘陰公從事工古文小篆八分亦能楷法尤善字學著古文汗簡十卷全倣許氏說文偏旁凡五百四十一字太宗朝官至國子監主簿

書小史卷第十終

善小與善長士遊則貴鄉人仕變異拜太師中書令少好學工書頗知屬文
學有餘其學則能以延四方之士

善長孫字履先性剛人少好學及長唐與宰相曹時以太子賓客居洛陽
時人分書尺牘謂者必札其端

朝計一字法按唐官在國子觀先觀印板多其所書當時謂畫重之其筆法
雖小必極精細然家書字學善帖文而觀生書金題在乃謂文融書凡正百
將忠鑒字應主善觀夫書能重所莫能然則愈窮刻公於事工古文小
成其書其南觀也愛趙懷許觀工而欲榮濟用宏陵等字宜御故之爲違命
而對善長漢學也善長思其德也善長入於學業而筆法助也
爾時善長謂金刻入觀善長顯師官任善長爲善長善長善長善長

(B)
908.1
4435
1936
v.4
no.9
~*~
0376656

(B)
908.1
4435
1936
v.4
no.9
pt.2